

Rapport dalla sessiun dil cussegl da vischnaunca dils 17-10-2016

Tractanda 1

Approbaziun dil protocol dalla sessiun dils 25-07-2016

Il protocol dalla sessiun dils 25-07-2016 vegn approbaus en votaziun unanima cun engraziament.

Tractanda 2

Parc Adula – approbaziun dil contract cul parc naziunal per ina emprema fasa da menaschi da 10 onns dil Parc Adula (2018-2027), approbaziun dils statuts sco era dalla participaziun all’Uniun Parc Adula

Il president communal declara che la suprastanza communal sustegni unanimamein il Parc Adula. Ord vesta dalla suprastanza ei il parc ina schanza per la vischnaunca ed ils convischins. Il parc ha gia ella fasa da project susteniu plirs projects e pliras occurrenzas en nossa vischnaunca. Sch’ei vegn decidu per il Parc Adula, vegn il parc a ver a disposiziun mintga onn 5.2 milliuns per projects e plazzas da lavur en las 17 vischnauncas pertuccadas. Il parc naziunal promova oravontut il svilup economic e las valurs culturalas e naturalas da nossa regiun. Il territori cumpigliau dalla vischnaunca da Trun sesanfla en la zona circumdonta dil Parc Adula. Ei dat neginas novas restricziuns per nossa vischnaunca. Il contract vegn serraus giu denter las vischnauncas e l’uniun Parc Adula ed entra en vigur ils 1 da schaner 2018. Il contract vala tochen alla fin dalla fasa da menaschi da 10 onns per la quala la confederaziun conceda al Parc Adula il label “Parc Naziunal”. Per sia prolungaziun sto il contract vegnir presentaus danovamein per l’approbaziun a votantas e votants da tuttas vischnauncas dil parc.

Questa sera ein treis representants dil Parc Adula presents per presentar il project e risponder a damondas. Quei ein Martin Hilfiker (directur), Sascha Pizzetti (vicedirectur) e Luca Baggi (vicepresident dall’uniun Parc Adula). Il cussegl da vischnaunca meina discussiun davart il Parc Adula e pren la caschun da tschentar damondas e schar informar detagliadamein davart il parc.

Cun 10 : 2 vuschs ed ina abstenziun approbescha il cussegl da vischnaunca il contract cul parc naziunal per ina fasa da menaschi da 10 onns, ils statuts sco era la participaziun all’Uniun Parc Adula e decida da suttametter quei conclus alla votaziun all’urna.

Tractanda 3

Revisiun parziala dalla lescha davart votaziuns ed elecziuns

La lescha vertenta davart votaziuns ed elecziuns datescha digl onn 1999. Il motiv principal daco che la suprastanza communal intenziunescha ina revisiun dalla lescha ei la moda da votar ch’ei semidada durant ils davos onns. Igl interess da serender all’urna ei daventaus fetg pigns. Varga 90% dallas votantas e dils votants nezegian la pusseivladad da votar a scret ni per posta. Per gronda part vegn il material da votar bess en scaffa da brevs avon canzia. Artechel 3 dalla lescha vertenta pretenda che l’urna vegn aviarta la sonda avon il di da votaziun durant duas uras. Plinavon fixescha quei artechel ch’ei sto vegnir dau caschun da votar all’urna a Trun, a Zignau, a Schlans ed a Caltgadira avon baselgia. La suprastanza communal ha constatau ch’ei vegn strusch fatg diever da votar all’urna la sonda en canzia e la dumengia avon baselgia.

Per quei vegn proponiu da midar igl artechel sco suonda:

L'urna principala vegn exponida en canzlia communal. Ella ei aviarta la gievgia ed il venderdis, mintgamai duront las uras da spurtegl e la dumengia da votaziun dallas 09.00 entochen allas 10.30 uras. En la fracziun da Schlans sa vegnir votau a scret en scaffa da brevs dall'antieriura canzlia communal da Schlans.

Plinavon succedan pintgas adattaziuns vid ils artechels 16, 20, 23 e 26.

Il cussegl da vischnaunca propona cun 13 : 0 vuschs alla radunonza communal d'approbar la revisiun parziala dalla lescha davart votaziuns ed elecziuns.

Tractanda 4 Approbaziun dalla cunvegna da prestaziun cun la Regiun Surselva pertuccont il Center da formaziun Surselva

Ella votaziun dils 30 da november 2014 ha il pievel grischun approbau la legislaziun adesiva tier la refuorma territoriala. Cunquei remplazzan naven dil 2016 las endisch novas regiuns ils cumins, las corporaziuns regionalas ed ils districts. Igl onn 2015 han votantas e votants approbau en tuttas vischnauncas-commembras ils statuts dalla Regiun Surselva. Tier artechel 6 da quels statuts eis ei previu che las vischnauncas dalla Regiun autoriseschan la Regiun Surselva da surprender diversas incumbensas communalas. Denter auter settracta ei era da menar e cofinanziar purschidas da formaziun e da terapia da tut gener, scalems da vegliadetgna e da scola sco era tier la scolaziun dils carschi. Tenor alinea 3 dil medem artechel ha la surdada dallas incumbensas da succeder tras cunvegna da prestaziun.

La presenta cunvegna da prestaziun pertuccont il menar il Center da formaziun Surselva ha la Conferenza dils presidents dalla Regiun Surselva approbau unanimamein ils 13 da settember 2016 per mauns dallas vischnauncas-commembras.

Il cussegl da vischnaunca approbescha cun 13 : 0 vuschs la cunvegna da prestaziun denter la vischnaunca da Trun e la Regiun Surselva pertuccont il menar il Center da formaziun Surselva e decida da suttametter quei conclus tenor art. 33 lit. i alla radunonza communal.

Tractanda 5 Verificaziun dil resultat dalla elecziun supplementara dils 25-09-2016

Cusseglia **Rafael Guldumann** declara che Flurin Decurtins ed el hagien sco commembers dalla cumissiun per verificaziun da votaziuns controllau ils resultats dalla elecziun supplementara dils 25 da settember 2016 ed anflau tut en uorden. En num dalla cumissiun propona Rafael Guldumann da verificar ils resultats publicai.

En votaziun unanima verifichescha il cussegl ils resultats publicai dalla elecziun supplementara dils 25-09-2016.

Tractanda 6 Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Kurt Wolf

L'actuara
Sandra Gautschi